



Kumpul input idea belia

SAIFUDDIN ketika sesi dialog bersama belia mengenai kos sara hidup belia di kementeriannya, semalam.

■ Sesi dialog bawa suara orang muda tangani isu kos sara hidup

Mohd Husni Mohd Noor
mhusni@hmetro.com.my

Putrajaya

Kementerian Perdagangan Dalam Negeri dan Hal Ehwal Pengguna (KPDNHEP) mengadakan dialog dengan wakil gabungan dan persatuan belia dari seluruh negara untuk mendapatkan input dan idea bagi menangani isu kos sara hidup dalam kalangan belia.

Menterinya, Datuk Seri Saifuddin Nasution Ismail berkata, sesi berkenaan membolehkan KPDNHEP menjelaskan dasar serta inisiatif yang dilaksanakan khususnya dalam menangan-

ni isu kos sara hidup. Beliau berkata, menerusi dialog itu, pelbagai persoalan dan cadangan dilontarkan.

"Sesi dialog disertai lebih 300 belia membabitkan 41 gabungan belia seluruh negara yang bernaung di bawah Majlis Belia Malaysia (MBM).

"Saya sangat teruja dan terkesan dengan pandangan serta persoalan disampaikan mereka. Justeru, saya mencadangkan kepada MBM inisiatif sama dilaksanakan di peringkat negeri.

"Melalui cara ini, isu ke-penggunaan dan kos sara hidup dapat diperluaskan terutama membabitkan belia," katanya selepas sesi dialog berkenaan.

Katanya, sebagai komitmen kerajaan membawa

suara belia bersama menangani isu kos sara hidup, KPDNHEP turut menyenaraikan Presiden MBM, Jufitri Joha bagi menganggotai Majlis Tindakan Kos Sara Hidup Negara dipengerusikan Perdana Menteri, Tun Dr Mahathir Mohamad.

Saifuddin berkata, sebagai sekretariat dalam majlis berkenaan, pihaknya dalam proses menyenaraikan wakil Majlis Belia Felda.

"Ini bukti kesungguhan kementerian yang melihat potensi dan sumbangan wakil belia di peringkat jawatan kuasa tertinggi diwujudkan kerajaan," katanya.

Pada masa sama, Saifuddin berkata, antara isu dibangkitkan belia dalam sesi dialog berkenaan ialah ber-

kaitan pemilihan rumah di mana mereka mahu kerajaan memainkan peranan dalam mengawal selia harga rumah supaya tidak hanya ditentukan oleh faktor lain.

"Mereka juga merasakan sistem data dalam program *Food Bank* di 11 universiti dilaksanakan KPDNHEP ketika ini lebih fleksibel iaitu turut memasukkan golongan M40 daripada keluarga besar supaya kelompok ini tidak tertinggal.

"Selain itu, ada cadangan subsidi kerajaan bukan saja diterima pengguna, malah bermula di peringkat sum-ber bagi memastikan harga akhir barangan pengguna tidak membebankan rakyat. Saya berjanji akan meneliti cadangan itu," katanya.